

IBOTOH NASIAM DO

“Ase dob marujung ihatahon Jesus haganup hata ondi, nini ma dompak susian-Ni, “Ibotoh hanima do, haduan ma pesta Paskah, ijai ma ondoskononkon Anak ni Jolma in, ase iparsilangkon.”

Mateus 26:1-2

Domma iparsiapkon Tuhan Jesus susian-Ni managam na masa na maningon saud mardalan. Anjaha ijon ma ipatugah punsa ni sitaronon sitampeihonon ni dunia in hu abara-Ni. Paompathalihon ma tugah-tugah-Ni on hubani susian-Ni. Tugah-tugah on sada tanda do on laho patorangkon arti ni Paskah, Anak ni Jolma pakon Parsilang. Paskah mararti haluahon, Anak ni Jolma ai ma na paluahkon anjaha parsilang ai ma dalan haluahon. Jadi luar biasa bagasni arti ni Paskah na pinatuduhkon ni Tuhan Jesus ai hubani susian-Ni.

Paskah na pinatuduhkon Tuhan Jesus do hinagok ni Paskah na dob imulai bangsa Israel tingki bungkas hun Tanoh Masir. Bani Paskah ai Tuhan Jesus do Malim. Ia do Biri-biri Paskah. Tuhan Jesus do manjamah peranan bani Pesta Paskah. Lang boi hubani halak na legan na bertindak gabe malim ijai. Janah hal on do mambahen ibursikkon susian na mantahihon-Si anjaha itonggohon na mamparsilangkon-Si.

Aha do horjani sintua ni malim pakon pangintuai ni bangsa tingki na dohor panorang Pesta Paskah? Marrapot sidea mangindahi dalan manangkap ampa mambunuh-Si. Tuhan Jesus roh mangondoshon diri-Ni. Ibotoh Jesus torang atap aha na sihol masa Bani. Lang isimbili sitaronon ai pakon silang in, ase saud bagah-bagah ni Tuhan. Tapi susian-Ni deba ma ai mantahihon, deba tartunduh, deba marparnalang, na deba nari marponop do. Sonaha do na talup sibahenon? Nini Tuhan Jesus: “Jaga ma anjaha puho ma.”

Ase patut do tongon botohonta atap aha ujungni hata, podah, panogu-noguon, panghopkopon, panaronon ni Tuhan Jesus, ai ma haluahon banta. Anjaha anggo domma ibotoh hita paboa haluahon do ujungni, hita pe patut do mangihutkon bokas na dob maluah janah sipaluah. Sonai homa age Paskah sedo Paskah biasa be, tapi domma gabe Paskah na istimewa janah sedo artini na penting tapi Jesus Kristus na manjamah peranan ai do.

Tonggo: *Ham Tuhan Raja ni haluahon, iondoshon Ham diri-Mu bahen tobus ni dousanami. Halani ai, tarima kasih ma hatahononnami hubani holong-Mu na tarsulur in. Naipe tong ope hanami mangindo ase Ham ma paahapkon anjaha pagoluhkon Hata-Mu songon na Bamu age bannami. Idop ma Ham Tuhan. Amen.*

HALELUYA NO. 243:1-2

1. Marigat langit ni langitan
ibaen holongni uhur-Mu.
Bannami ganup na boritan,
patalar Ham ma holong-Mu!
Ididah jolma haganupan
pangisi ni dunia on;
Ai roh do Ham tongon,
o Tuhan, mangkopkop ganup jolma on.
2. Iporsan Ham do ganup dousa
ni manisia haganup;
In ma mambahen marutang hosah,
Ham manggalari in ganup;
Itaron Ham do hamateian,
bai hayu na marsilang in;
Pamasuk Ham hanai,
manean, na mantin na i surga in.

MANGKARINGGASHON HORJA NA MADEAR

“Hatengeran ni uhur do hata in, anjaha ipindo uhurhu, ase gomos ma panaksihonmu bani hata in, ase sidea na dob porsaya bani Naibata, ra mangkarringgashon horja na madear; in ma na madear anjaha na marguna bani jolma.”

Titus 3:8

Hata on ai ma sebagian humbani surat ni si Paulus hubani si Titus. Ise do si Titus? Halani haporsayaon bani Jesus Kristus pakon horja i tongah-tongah ni kuria isobut si Paulus do si Titus anakni tongon. Bani pardalanan zendingni onggga do itadingkon Apostel Paulus si Titus i Kreta, sada pulau na i Laut Tengah. Itadingkon pe ia ase ipatorsa horja na tading ijai janah ase ipabangkit sintua bani ganup huta songon niaturhon Apostel Paulus bani. Itadingkon halani buei sihorjahononni.

Marhiteihon si Titus buei do golpa-golpa ni Apostel Paulus bani halak Kristen na i Pulau Kreta. Deba ma ai pambalosi sidea bani pamarentah, ulang siparingor anjaha lamlam bani haganup halak.

Ijon ipindohon Apostel Paulus do ase gomos panaksihon ni si Titus bani hata ai janah ase sidea na porsaya bani Naibata ra mangkarringgashon horja na madear. Horja na madear ai, in ma horja na hasilni marguna bani jolma. Marhitei hata na legan boi hatahonon, ase halak na porsaya bani Naibata gabe siparhorja na ringgas. Lang gabe jolma na pitah parangan-angan atap marsahap-sahap hansa harosuhni. Janah horjani maningon horja na madear, na tama, na positip, na pagoluhkon janah marguna bani jolma.

Sada perintah kerja na humbani Naibata do hata on banta. Ai hamajuan atap masa depan na dear lang dapot ai songon pardapot ai na manikam lotere, atap halani nasib sibaran.

Anggo lambin iharringgashon mangkorjahon na madear bani hasoman jolma pakon bani dirinta, ijai do hita maluah janah martuan pasu-pasuon ni Tuhan Naibata, sonari ronsi sadokah ni dokahni.

Tonggo: *Urupi Ham hanami Tuhan ase itadingkon hanami rayoh tapi ase idompakkon hanami haringgason marhitei horja na madear na marguna bani jolma. Amen.*

HALELUYA NO. 145:1-2

1. Ringgas hita rup, manogu ganup,
na pag manendel na hengken hobal,
bai Hata ni Tuhan, na sangap
tongtong rosuh-Ni ma bahen i dunia
on.
2. Sai ulang be da mabiar ganup,
boiskon ma da gogohmu ganup!
Age roh sibolis lao mandorab ho,
sai tatap ma Jesus na lampou gogoh.

RUMAH NI NAIBATA

“Anggo dong na parsedahon rumah ni Naibata, parsedaon ni Naibata do ai, ai na pansing do rumah ni Naibata, ai ma nasiam.”

1 Korint 3:17

Anggo isobut rumah ni Naibata mintor laho do uhurta hu bani Gereja ianan marminggu. Janah anggo ihatahon parsedahon rumah ni Naibata mintor iagan hita ma ai halak na mangotori Gereja, mamosahkon jendelani, ronsi na manrumbakkon.

Sasintongni na igoran rumah ni Naibata lang pitah bangunan Gereja pinaturei ni jolma. Tapi songon pangkatahon ni apostel Paulus, ai ma halak Kristen na i kota Korint ijia sonai age hita halak Kristen marsada-sada bani panorang on.

Sonaha do boi Naibata marrumah atap marianan bani dirinta? Sonaha do boi homa Naibata marrumah atap marianan bani parsaoan ni halak Kristen in? Ai ma marhitei Tonduy Napansing. Halani songon na binotohta Tonduy do Naibata na so boi ibatasi age aha, tapi boi marianan age aha, tapi boi marianan age ija romban harosuh ni uhur-Ni.

Halani rumah ni Naibata dirinta maningon jaga do bahenon, ulang kotor atap maseda. Lang ra sahundulan pakon imbang-Ni. Halani rumah ni Naibata do hita, ulang iparseda hita dirinta. Sonai age parsaoan ni halak Kristen ibagas kuria in, lang bulih parsedaon. Ai na parsedahon rumah ni Naibata do ia. Halani domma itobus daroh ni Tuhan Jesus hita, lang hita be simada dirinta.

“Seng au ompung ni au.” Nini dodingta bani Halleluya No. 96. Halani rumah ni Naibata do hita maningon do pansing. Lang boi butak ase saud Naibata marianan. Lang boi dos hita pakon halak na so manjalo Tuhan Jesus. Hapansingon ai ma sifat atap ciri khas ni rumah ni Naibata na maningon taridah humbani diri ni halak Kristen, rumah tangga pakon parsaoan ibagas kuria ni Tuhan.

Secara sadar atap lang sai ulang ma adong hun tongah-togahta, na parsedahon rumah ni Naibata.

Tonggo: *Ham Tuhan Naibata marhitei Tonduy Napansing, roh janah marianan ma Ham tongtong ibagas hanami, ase rumah-Mu hanami. Amen.*

HALELUYA NO. 265:1+6

1. Ai dohor Tuhanta,
unduk bei ma hita
lao manambah Naibatanta.
Turun Naibatanta,
hu tongah-tongahta,
ningon sip ma ganup hita.
Sombah ma Naibata,
na tang sitimbulan
na so halompouan.
6. Sai iankon ahu
rumah-Mu uhurhu,
pinapansing-Mu ma ahu;
Masuk Ham hu bangku
'se holong uhurhu
hu Bamu o Naibatanku!
Soh pe au, barang lao
Ham ma sai hutatap
janah hupasangap.

LAMBIN MA MANGKAHOLONGI

“anjaha tongon idalankon nasiam do sonai bai haganup sanina na i Makedonia. Tapi ipodahi hanami do, nasiam sanina, ase lambin sonai ibahen nasiam.”

1 Tessalonika 4:10

Golpa-golpa ase marparlahou na pansing ai do inti ni surat ni apostel Paulus bani 1 Tessalonika 4:1-10. Aima, ase ulang dong bani sidea panriah-riahon, ase marsinrumah pitah sada, marhahormaton, lang mangihutkan hisap-hisap ni daging, ase ulang manlagei pakon na legan. Halak na so pansing parlahouni na doskon na manulak Naibata do ai.

Sobali parlahou songon sinobut ibabou, ipindohon apostel Paulus do homa ase lambin marsihaholongan sidea. Pasal on namin domma ilahoi halak Kristen na i Tessalonika. Tapi holongni antar sidea ope. Gabe porlu ope ipabanggal janah ipajonam na maronjolan Hata ni Naibata. Tarbarita do namin ijia parlahou ni halak Kristen na i kuria Tessalonika mambahen pala ihatahon apostel Paulus, “Gabe siusihan do nasiam bani sagala na porsaya i Makedonia ampa i Akaya.” (1 Tessalonika 1:7) Ge pe sonai maningon lambin ipataridahkon aha na dob jinalo humbani Naibata.

Lambin mangkaholongi mararti do lambin ringgas manggoluh na baru, lambin mangkabiari Naibata, lambin ringgas marhorja lambin mambalosi Hata ni Naibata. Sadokah ibere Naibata pe panorang, hajorgitan, uhur pakon pingkiran na sehat, maningon pakeionta do ai untuk peningkatan pelayanan Bani. Lang bulih hatahononta domma salosei horjangku, domma lunas utangku bani Naibata. Lambin mangkaholongi lang mararti pitah mangkaholongi hasoman. Ai bani ambilan ni Tuhan Jesus i atas dolog torang do ipatugah pasal holong. Janah on ma deba na gabe etika ni halak Kristen on. Nini ijia, “Tapi Ahu mangkatahon bennima: Haholongi hanima munsuhnima, anjaha tonggohon hanima ma na marburu hanima, ase gabe anak ni Bapanima, na i Nagori Atas ai hanima ... Ai anggo holong ni uhurnima pitah bani na marholong bannima, aha ma upahnima? Ai sijalo sohei pe lang sonai ibahen?” (Mateus 5:44-46)

Sai lambin ganda ma holongta songon hinarosuhkon ni Tuhan na dob parlobei mangkasomani hita.

Tonggo: *Rahut Ham ma hanami Tuhan ibagas holong na hum Bamu, ase lambin ganda holong nami tarlobih bani na so hasomannami. Amen.*

HALELUYA NO. 248:1+7

1. Huhaholongi Ham, gogohku,
huhaholongi Ham tongtong.
In ma marhitei pambaenanku,
humbani gok ni uhurhon.
Ai Ham do manondangi au,
ronsi na matei au.
7. Huhaholongi sortalingku,
Ham Naibataku na botul;
Sonaha pe pangandunganku,
irikkononku Ham bujur.
Huhaholongi Ham tongtong,
ronsi na matei au.

HAM MA MAMIMPIN LANGKAHKU

“Parlajouan na somal bani jolma do masa bani nasiam: Hatengeran do Naibata, seng paturuton-Ni nasiam lajouan lobih hambani gogoh nasiam: tapi rap pakon parlajouan ai bahenon-Ni do homa hadobanni, ase tartaron nasiam.”

1 Korint 10:13

Gati itangar hita hata: Banggalni in parlojuan na bangku on. Ra hita sandiri pe hotop manluarhon sitaronon sonai, naborit, parniombahon, tekanan ekonomi pakon na legan. Ganupan on gati mambaen pusok tumang uhurta. Lang marhasonangan. Janah anggo sonon ma lalab, gati mamboan hita hu pandoleian, lang marpangarapan. Bani situasi na sonon ra tubuh homa ibagas uhurta: Domma dokah ahu na gabe Kristen on, sonin ma rajin diri marminggu pakon na legan, tapi sonon ma mardondon parlojuan na maningon taronon. Mase ma paturuton ni Naibata hanami sonon, gabe Naibata isalahkon hita.

Tapi na porlu botohonta bani goluh on ai ma: Lang onggga ilajou Naibata hita. Halani lang gabe parsuba-subaan hita ijadihon. Lang homa hambani sibolis atap na i luarni dirinta na mambahen hita hona lajou. Tapi na hona lajou do jolma in anggo itarik-tarik anjaha iompan-ompani hisap-hisap ni uhur ni sandiri ia. Anggo marbanggal ma hisap-hisap ni dagingni uhur ai, itubuhkon ma dousa. Anjaha dob gok dousa ai, itubuhkon ma hamateian. Jadi hambani dirinta sandiri do hape mulani parlajouan ai ronsi sitaronon ai. Gabe songon na hinahatahon ni umpama ma: Uhur do mulani podou. Ai do ase ihatahon apostel Paulus on parlajouan na somal do na masa banta. Ai haganup do jolma in gabe paruhur na tinurutan dob madabuh hu bagas dousa.

Ai pe pardear layak janah parholong atei do Tuhan in na dob manghopkop hita. Seng hape paturuton-Ni hita magou halani pambahenan na dob in. Lang homa paturuton-Ni manaron hita torus age pe halani pambahenanta janah lang homa paturuton-Ni lobih hambani na porsanonta. Na mararti: Lang marosuh Naibata halani sitaronon ni jolma in gabe magou hita. Tapi sipata ipaturut Naibata do hita manaron halani pitah Tuhan in do na boi mandobkon sitarononta ai. Ai do homa ase setiap saat hita mangindohon tonggo na niajarhon ni Tuhan Jesus banta: Ulang ma bobai Ham hanami hu parlajouan tapi paluah Ham ma hanami hambani pangagou.

Tonggo: *Tenger do uhurnami sai na urupan-Mu do hanami manlawan hisap-hisapnami ase ulang madabuh be hanami hu parlajouan pakon sitaronon, tapi Ham ma mamimpin langkahnami pakon ganup goluhnami hunjon hujanan. Amen.*

HALELUYA NO. 108: 1+12

1. Sanggah holong tong Tuhanta,
na mangidah hita on.
Imbang hita ma dirinta
tanda jora hita on.
12. Dirimin do musuhnima
pakon sipangagou in.
Anggo hagoluhannima,
in ma Tuhan Jesus in.

PARLAHOU NI KELUARGA NI NAIBATA

“porini hun dokah ahu roh, gabe ibotoh ho sonaha patut marparlahou ibagas Rumah ni Naibata, in ma kuria ni Naibata na manggoluh in, tiang ampa onjolan ni hasintongan in.”

1 Timoteus 3:15

Somal do itangar hita tukas-tukas na mangkatahon: Ulang ma hita songon jolma jabolan, jolma tuduhan, sanggah dompak lang adong sihataon. Tundal honsi parsahap pe lang palaron. Memang gati do pangabakta songon jolma jabolon na so madear. Anggo i lobei ni tuanni, dear-dear ma ganup parsahap pakon parlahouni. Tapi anggo laho honsi tuanni ai, maruhur-uhur bani parlahou pakon pangabakta. Ra ma sipata parsahap pe gabe songon tuan ma. Baru pe hira-hira laho honsi ipadear hita na porlu, ase ulang ibotoh tuan ai holi ninuhurta, artini: Goluh na marsipakulah-kulah. Hape anggo Naibata ibotoh do ganup age sonaha pe ponop ni parlahouta bani goluh on.

Suang sonai do podah parmahanion ni si Paulus on bani si Timoteus. Age pe lang rap ia pakonsi i Epesus, malah porini pe hun dokah baru boi ia manjumpahkonsi, tapi marhitei suratni on ase ibagas haganup tugas, goluhni maningon patuduhkon pangabak songon halak na dob tinobus ma tongon. Songon parlahou ni anggota keluarga ni Naibata ma tongon. Anak na maluah. Lang jabolon. Setiap saat maningon ibotoh hita janah tongtong manggoluh, marparlahou ronsi parsahapta songon anak panean i Rumah ni Naibata ma. Marparlahou i bagas Rumah ni Naibata lang mararti Gereja tumang bani ari minggu. Atap bani ari-ari tertentu anggo dong partumpuan partumpuan ni halak Kristen. Tapi bani ganup ari, ianan pakon ganup situasinta maningon baheonta ganup голуhta songon pangisi Rumah ni Naibata. Halani lang pitah bani ari tertentu tumang hita gabe halak siirikkon Tuhan in, na mararti maningon ganup голуhta do homa pataridahkon ha-Kuriaon, ha-taraturan na humbani Naibata ibagas na mangisi ari-ari ni goluh na binere ni Tuhan banta. Sirsir do Ia tong marianan janah mangurupi hita. Halani Ia do tiang panungkoli anjaha Ia do onjolan ni hasintongan in. Lang adong hasintongan i luar ni na humbani Naibata. Ase anggo ipadaoh humbani Naibata, na padokahkon hasintongan in ma ai, janah parrohkon hamagouan hu banta sandiri.

Tonggo: *Pargogohi Ham ma hanami ibagas na mangisi ganup ari-ari na binere-Mu in, ase boi ipataridahkon hanami goluh pakon pangabak na kuria ma tongon selaku anggota keluarga-Mu hanami i dunia on, ase boi taridah homa hasintongan-Mu marhitei hanami bani ganup situasi ni goluhnami. Amen.*

HALELUYA NO. 459:1+3

1. O, Tuhan tiap jam,
au mamorluhon Ham.
Ai Ham tumang na boi,
pasonang uhurhin.
Bai haganup ianan,
Ham do hu pindahi.
Na roh do au sonari,
holong ma Ham.
3. O, Tuhan tiap jam,
Bamu ma goluhkin.
Anggo daoh do Ham,
soya do ganup in.
Bai haganup ianan,
Ham do hu pindahi.
Na roh do au sonari,
holong ma Ham.

ASE LAMBIN MARBANGGAL HOLONG NI UHURTA

“Anjaha on do hutonggohon, ase lambin marbanggal holong ni uhur nasiam marisi habotohon ampa pangarusion na gok,”

Pilippi 1:9

Porini ibahen hita sada panorang laho manungkun hu bani hasoman pasal keadaan di goluhni, ra bagei do dapot hita balos ai. Janah porini isungkun hita dalan-dalan aha na ibahen laho pajoreihon ai, bahat do homa dapot hita balos usaha ni sidea. Hansi roh sungkun-sungkun hu banta: Domma ibotoh hita keadaan ni hasomanta, naha sungkup ma sibar mambotoh horjanta?

Ambilan on paingatkon hita ase lambin marbanggal holong ni uhurta hu bani hasomanta, songon bangga ni holong ni uhur ni Tuhanta na mamberehon Anak-Ni Jesus Kristus laho paluahkon hita. Ase lang sungkup pitah na mambotoh tumang hansa hita hape. Tapi usaha aha na dob ibahen hita na patut sebagai halak Kristen hu bani halak na legan. On do na porlu sungkun hita dirinta. Domma nani marisi habotohon ampa pangarusion na gok holong na huhorjahon on? Atap lape.

Sintong do ai, ningon na botoh do lobei keadaan ni hasoman jolma. Tapi irik hujai na bahen ma horja haholongan ai. Janah ai ma itonggohon Apostel Paulus bani Kuria Pilippi, age hu banta bani panorang on. Andohar ipargogohi Tuhan hita laho mangkorjahon rosuh ni uhur-Ni, songon na pinindo-Ni banta.

Age hita, patut do na tonggohon hasomanta bani horja na madear ai.

Ase ganup hita margogoh, mambotoh na madear ronsi mangkorjahon na madear ai ibagas habotohon ampa pangarusion na gok.

Tonggo: *Tarima kasih ma bamu Tuhan, na mambere habotohon ampa hagogohon laho mangkorjahon horjanami ari-ari. Ajari Ham ma homa hanami, ase ipakei hanami idop ni uhur na binere-Mu in gabe dalanami mangkaholongi Ham age hasoman jolma. Amen.*

HALELUYA NO. 446:1-2

1. Sisada angkula do hita ganupan,
ragam ni pagori do hita tongon.
Na sombuh, bayak dos do in bani Tuhan,
seng dong ilioi, isarihon do tong.
Tuhanta do na gabe Hayu Anggur,
ranting-Ni do hita on hajojo.
Jolom ma Jesus ulang ham pandur,
ase tabun marbuah na ramos.
2. Tanda ni sisada angkula do hita
rap marpangarapan bani goluh in.
Nai do bani horja rap marsiurupan,
ulang dong na marsidalian ijin.
Tuhanta do na gabe Hayu Anggur,
ranting-Ni do hita on hajojo.
Jolom ma Jesus ulang ham pandur,
ase tabun marbuah na ramos.

HORJA NA MADEAR

“Tapi nini Tuhan Jesus ma hubani sidea, “Buei do horja na madear humbani Bapa Hupatuduhkon bani nasiam. Halani horja do, ase sihol pargijigon nasiam Ahu?”

Johannes 10:32

Laho mandalankon pakon mangkaporsayai sada hasoman, parbujur atap parsintong ai, boi do botohonta bani horjani, pangabakni pakon parsahap na madear dompak hasoman. Halani anggo humbani hatani sandiri mangkatahon: Au parbujur, parsintong, pardear layak pakon hata na paginjang-ginjang diri, torus porsaya ma hita bani, kemungkinan boi tertipu hita. Somalni, jolma sisonai ai lambin seng ihaporsayai hasomanon age lang pala na hatahon: Kristen na sintong do ahu janah buei do jasa-jasangu i tongah-tongah ni kuria in. Sungkup ma marhitei ni horjanta baen hita patugahkon ai haganupan bani hasoman. Janah sikap sisonai do na iharosuhkon ni Naibata Bapanta.

Ididah hita carani Jesus laho patandahon diri-Ni bani dunia on, tarlobih ma ai bani halak Jahudi sanggah panorang goluh-Ni. Lang ihatahon Ahu do Naibata, Kristus Mesias, simada kuasa. Isungkuni halak Jahudi ai do Ia, marhiteihonni sungkun-sungkun, anggo Ham do Kristus in hatahon Ham ma torang bannami. Balos ni Jesus bani sidea, horja na Huhorjahon marhitei goranni Naibata Bapa, ai do na manaksihon pasal Ahu.

Ipataridahkon do diri-Ni hu banta Ia do sipaluah in, marhiteihon na marambilan Ia pasal Haluahon in. Janah tanda-tanda halongangan na hinorjahon-Ni paboahon Ia Anak ni Naibata na i tongos hu dunia on gabe Sipaluah banta. Tapi age pe sonai buei ni tanda-tanda halongangan na dob ipataridahkon Jesus bani halak Jahudi ai parsangsiaon do bani sidea pasal Jesus, janah sihol pargijigon Ia use. Uhur na hengkening do na marianan bani halak Jahudi, lang sirsir sidea manjalo Jesus na gabe Sipaluah mambahen seng dihut sidea maluah.

Jesus do Dalan pakon Hasintongan na so porlu sisangsihonon horja-Ni. Humbani haganup horja-Ni ai do bukti janah sijolomonta laho mangkaporsayai-Si. Halani ai ulang pahengkening ham uhumu laho manjalo Jesus Kristus ase dapot hita hasonangan magira.

Tonggo: *Urupi Ham ma hanami laho mangkaporsayai Ham, ase ulang hengkening uhurnami tapi ase dapoton hasonangan hanami hum Bamu sonari pakon magira. Amen.*

HALELUYA NO. 231:1-2

1. Ham Tuhan Jesus, Ham Rajangu,
tangihon Ham ma au tongtong.
Dousangu sihol solsolanku
Bamu sigomgom tanoh on;
Ai sihol do manggoluh ahu
marhitei-hitei daroh-Mu.
2. Buei do dousa di tanganku,
uhuru pe gok dousa do;
Matangu ampa angkulaku
ganupan in gok dousa do;
Sai sasap Ham ma dousangkin,
Marhitei-hitei daroh-Mu.

BUAH NI HALIHARON

“ai buah-buah ni haliharon ai ma sagala halayakon, hapintoran ampa hasintongan.”

Epesus 5:9

Ongga do ididah hita sada suan-suanan mambuahkon na legan na lang sejenis bani suan-suanan na legan manompang hidup (parasit) bani suan-suanan ai. Janah dobni matei ma suan-suanan ai halani mansedai do suan-suanan ai.

Usih hujai do homa pargoluhanta halak Kristen. Lang sadar hita domma manompang hidup banta goluh na parsedahon bani dirinta pakon bani hauhuronta. Ai ma goluh hagolapan na mambuahkon buah na masambor, na lang mardomu hu bani harosuh ni Tuhan Jesus simada hita. On do na mambahen ase hotop hun tongah-tongah ni halak Kristen mambuahkon buah na legan. Tontu anggo torus ipaturut hita marianan goluh na marugihon on banta, dobni songon suan-suanan na i atas in gabe matei lang mamboan hasil. Artini matei ma haporsayaonta, maseda ma pardomuanta dompak Tuhan.

Songon na hinatahon ni teks on: “Ai buah-buah haliharon ai ma sagala halayakon, hapintoran ampa hasintongan.” Nini Tuhan Jesus do homa: humbani buahni do tandaon hayuni. Ase humbani horjanta siganup ari do boi tangkas itanda hasoman hita na dob marianan hita bani haliharon atap pe na dob Kristen. Na tolu pahara na isobut ibagas teks in, halayakon, haliharon, hasintongan, mencakup haganup horja na madear. Marsibere-bere songon hataridahon ni ha-Kristenonta. Ase tangkas ibotoh hita sibere-bere pakon pasu-pasu na dob ijalo hita humbani Naibata ai do use na ilayak-layakkon hita hu bani hasoman. Jadi ase ulang sontou sibere-bere humbani Naibata banta maningon adong homa hasirsironta manoruskon pasu-pasu ai na songon tanda ni hatarimakasihonta. Halani ai ulang mabiar ham marsilayak-layak, marhitei atap aha na dong bamu.

Ase torus dear pardomuanta pakon Tuhan Naibata, iporluhon homa hapintoron ampa hasintongan maningon manggoluh banta. Berarti pasal on menyangkut kejujuran bani haganup horja pakon persoalan. Halak na jujur ai ma na lang mangkarosuhkon horja na geduk pakon na masambor. Jadi anggo taridah ma horja na madear ai manggoluh banta, tangkas ma tandaon ni hasoman hita na dob manjalo haliharon janah gabe harosuh ni Naibata ma hita.

Tonggo: *Domma ibotoh hanami ale Tuhan aha na talup sihorjahononnamini na mardomu hu bani harosuh ni uhur-Mu, janah urupi Ham ma hanami ase margogoh hanami mangkorjahon haganup horja na madear. Amen.*

HALELUYA NO. 115:1-2

1. Sadokah ho i tanoh on,
papintor uhurmin,
padingat-dingat ma tongtong
nidok ni Tuhanmin.
2. Sai songon hayu dear ho
ramos parbuahniin.
Bulungni pe tabun homa
usihi ma sonin.

PATORUH UHUR

“Patoruh nasiam ma uhur nasiam i lobei ni Tuhan in, jadi pagijangon-Ni ma nasiam.”

Jakobus 4:10

Sipata buei do salah pangarusion pasal tujuanni na patoruh uhur. Patoruh uhur lang mararti gabe jolma sioto-otoan. Halani buei hasoman mangkatahon: Halak na patoruh uhur, gabe sidege-degean ni halak. Tarlobih ma jaman sonari on. Marhiteihon ni hata na sonin gabe mabiar deba hasoman patoruh uhurni, dobni sigijang uhur use ihatahon hasoman.

Patoruh uhur manuntut sikap, parsauran, pangabak, pergaulan pakon parsahap na jenges bani ganup panorang. Halani anggo ramah hita dampak hasoman janah lang onggarsinggung ibahen hita perasaan ni na legan tontu isobut janah igoran do hita jolma na bujur. Marpangabak na madear ai do artini na patoruh uhur. Tontu lang marhitei na bujur hita gabe sioto-otoan ni hasoman. Jadi ulang mabiar ham laho patoruhon uhurmu halani jolma sisonai do gabe sipujian.

Na porlu sisadaronta, aha do upah ni halak sigijang uhur. Jelas do ibotoh hita, lang adong upah ni jolma na pagijang-gijangkon uhur. Hasoman pe lang mangkarosuhkon tarlobih ma Naibata. Ipaturuh Naibata do use sigijang uhur, marhiteihonni ai, lang dapotan pasu-pasu pakon idop ni uhur, ia. Halani tarmasuk na lang mambalosi pakon na lang mangkaporsayai Jesus Kristus do halak sigijang uhur.

Tapi aha do upah ni halak na ra paturohkon uhurni? Ayat na iatas in ma balos banta, sihol pagijangon ni Naibata hita. Bagei do dalan-dalan pakon cara ni Naibata laho pagijangkon hita, marhitei pasu-pasu-Ni.

Patoruh uhur i lobei ni Tuhan in, mararti do in adong panandaion diri. Porlu tandaonta hita jolma pardousa, na galek, na hurang, na lang boi manggoluh anggo lang marhitei gogoh na hambani Tuhan. Tontu halani panandaion on gabe adong ma harsirsiron mangelek, marsombah janah marsuhutan dampak Tuhan aha na porlu banta. Pangakuon pakon haporsayaon pasal hagogohan ni Tuhan ijai do use pagijangon-Ni hita.

Halani ai anggo sihol sangap ham patoruh ham na uhurmu, i lobei ni hasoman pakon i lobei ni Tuhan in.

Tonggo: *Ulang paturut Ham hanami ale Tuhan gijang uhurnami i lobei-Mu, age i lobei ni hasoman jolma, tapi pasingat Ham ma hanami marhitei Tonduy Napansing, ase ibotoh hanami martoruh ni uhur tongtong dampak Ham. Amen.*

HALELUYA NO. 348:3

3. Ipasu-pasu Tuhan in ganupan hita on, ase pongkut ma uhurmu marhorja pe ringgas. Patoruh uhurmu homa bai Tuhan Naibata, totap bani hata-Ni da, ibagas holong in.

ISE DO PANOTAP BAMU?

“Patotapon-Ni do nasiam ronsi ujungni, gabe seng sihataon be bani ari ni Tuhan Jesus Kristus.”

1 Korint 1:8

Bani halak na lang manggoluh ha-Kristenonni ampa sipelebegu, buei do mamakei panotap na humbani datu. Panotap ai termasuk sada panjaga badan ulang i tokoh hasoman janah mabiar hasoman dompaksi. Umumni na mamakei panotap na sonin mangkorhon habaranion bani halak na mamakei, dobni tubuh use gijang ni uhur bani, mambahen anggap enteng bani hasoman pakon bani haganup persoalan.

Iparseda do hauhuron ni na mamakei panotap humbani jolma. Urah emosi, mambahen gati martinggil, tarbador, jadi sihataon i tongah-tongah ni masyarakat. Na deba lang ihaporsyai hasoman sahuta, halani parsangsian bani horja ni na jahat, mambahen hagigi ni Kuria in.

Ase panotap na sonaha do porlu pindahanta sondahan on, ase ulang tarbador pakon sihataon hita? Hita halak Kristen, Anak ni Naibata, isungkun hita sonari, ise do panotap bamu? Sungkun-sungkun na paduahon, atap ipakei ham ope panotap songon na isobut i atas in, mambahen tarbador ham.

Jesus Kristus do panotap banta. Ia do na patureihon pakon na mansarihon goluh ni hita jolma, mambahen totap hita marmalas ni uhur, harosuh ni hasoman janah lang sihataon bani goluhni, tarlobih panorang bani ari ni Tuhan Jesus Kristus.

Panotap na humbani Jesus Kristus mambere sada jaminan mulai humbani sonari ronsi ujungni. Ase lang pitah menyangkut goluh magira hansa sasaranni tapi dapotan ham sonari janah panrupei ham bani arta hasonangan ai. Halani anggo ibahen ham Jesus panotap bani dirimu, hauhuron ipasonang, lang urah emosi, tapi gok damei mambahen marosuh hasoman margaul pakon hita. Jadi seng dong be uhur gobir pakon biar, tontu malas ni uhur mando marianan ibagas na mandalani goluh on hita. Ase ulang be iparsumahon hita panotap na humbani Jesus Kristus marhiteihon na mangkagoluhkon Hata-Ni pakon mangkaporsyai-Si.

Tonggo: *Jumpahan malas ni uhur do hanami, anggo Ham ibahen hanami panotap goluhnami. Janah lang tarbador pakon sihataon be hanami ronsi das bani panorang parroh-Mu. Amen.*

HALELUYA NO. 344:1+4

1. Jesus Tuhanku rajai Ham au on.
Ase mangihut Bamu au tongtong.
Sai iankon Ham tongtong uhurhon.
Ulang be masuk na legan hujon.
Jesus pasonang uhurhu tongtong,
totap marguru hu Bamu au on.
4. Na marhaposan bai Jesus ale,
sai na martuah do use hape.
Na marsigantung bai Jesus tongtong,
janah paruhur na bonar tongtong.
Sonang do ai i dunia on,
sonang homa i surga in tongtong.

NA MAMUNGKAH PAKON MANDOBHON HORJA NA MADEAR

“Anjaha tenger do uhurhu, Ia na dob mamungkah horja na madear ibagas nasiam, do bhonon-Ni do in das ronsi ari ni Kristus Jesus.”

Pilippi 1:6

I lobei ni ayat on boi do ididah hita, na martarimakasih janah martonggo do si Paulus i bagas malasni uhur humbani Naibata, domu halani parsaor ni anggota kuria Pilippi ai humbani na madear in humbani mungkah ni.

Sada horja na madear, aima marsaor hubani Ambilan na Madear in. Marsaor mararti dihut marsimada anjaha aktif manangihon, mangkagoluhkon ronsi mangambilankon hata ai. Hinorhonni pasu pasu Naibata, gabe lang pitah manjalo ambilan na pinadas ni si Paulus hansa sidea, tapi marsaor do homa sidea laho pararatkon ambilan ai hu bani halak na legan. On do halani ase martarimakasih anjaha martonggo si Paulus ibagas malas ni uhur hu bani Naibata.

Aha na gabe onjolan ni si Paulus bani hatarimakasihon pakon tonggoni ai, aima tenger ni uhur pakon haporsayaon paboa Naibata do na mamungkah horja na madar ai ibagas dirini sidea. Porsaya ia sedo halani gogoh ni si Paulus pakon pagori ni kuria ai ase boi sidea manjalo ambilan pasal Harajaon ni Naibata, tapi Naibata sandiri do na marhorja janah na mamungkah sagala horja na madear ibagas hadirionta ibagas sagala horja pakon pargoluhanta. Haporsayaon pakon tenger ni uhur ni si Paulus homa ijon, aima Naibata na bujur, Naibata na lang ra paturutkon atap manadingkon horja ni Tangan-Ni. Lang marosuh anjaha lang mungkin Naibata paturutkon pakon manadingkon horja-Ni rais atap sasang, tapi maningon torushonon-Ni do ai das hubani na salosei pakon das hubani tujuanni.

Tujuanni horjani Naibata ibagas pargoluhan ni hita jolma, ai ma hamonangan, hasangapon pakon hamuliaon na gok ai. Marhiteihonni na dapot hita haluahon pakon hagoluhan ni na sadokah ni dokah ni marhiteihonni hagoluhanta tarlobih ma ai bani Ari ni Tuhan in; ai ma parroh-Ni na paduahalihon.

Patut ma hita tongtong marmalas ni uhur ibagas tarimakasih pakon puji-pujian bani na dob ipungkah janah na laho do bhonon ni Naibata sagala horja na madear ibagas hadirionta, anjaha ningon totap ma hita ibagas pangarapan na sonai ai

Tonggo: *Tarima kasih ma Bamu Tuhan halani horja na madear na pinungkah-Mu ibagas dirinami. Urupi Ham ma hanami ase tongtong hanami marmalas ni uhur pakon marpangarapan bani tujuan ni horja-Mu in. Amen.*

HALELUYA NO. 239:4+5

4. Na bonar do Naibatanta,
janah na pansing botul.
Na pentar tumang do Ia,
pagoluhkon haganup;
Hatundalan na botul
Naibatanta na bujur.

5. Na sintong ganup Hata-Ni,
na tinonahkon-Ni in.
Ampa idop ni uhur-Ni,
seng paubahon-Ni in;
Naibata balosi ham,
ase sonang use ham.

HASABARON NA MANGKORHON HALUAHON

“Marhitei hasabaron do maluah hosahnima.”

Lukas 21:19

Sajuta persoalan pakon paruntolan do ihadapi hita bani goluhta idunia on. Bani na porsaya sonai do age bani na so porsaya ope. Lang adong jolma age sada pe idunia on maluah bani na sonai ai. Tarlobih ma ai saat-saat na paling manontuhon bani goluhta on, ra pagantih soluk janah maragam ragam roh bani paruntolan.

Songon na pinatorang ni Jesus i lobei ni ayatta sadarion, na marpardomuan hu bani “parlobei ni panorang parpudi ai,” borat tumang do pangarouan pakon paruntolon na laho sihadapon ni na porsaya in. Buei tarbogei barita panorang, hageoran pakon parmunsuhon. Buei na mangayak-ayak ronsi na mangarsik na porsaya in, tapi **“BARAH PANORANG PARPUDI.”**

Ayat na i atas in mangkatahon: “Marhitei hasabaron do maluah hosahnima.” Maksudni haluahon ijon lang pitah haluahon ni hosah, tapi haluahon ni sagala hadirionta do. Hasabaron mararti do ai laho padaohkon pandoleian, anjaha ase totap ibagas haporsayaon. Ai do ase ihatahon bani judul na i atas in: Hasabaron na mangkorhon haluahon. Jadi lang maksudni: Ase na tarongkon gelah tanpa dong penanggulangan age pe sonaha boritni janah borat ni pangahapan. Halani hasabaron ibagas arti na sonon, hasabaron na lepak do on.

Tapi hasabaron na imaksud ijon ai ma hasabaron na paluahkon. Artini, ulang halani keadaan na hurang atap paruntolon gabe sangsi anjaha lang porsaya be hu bani Tuhan in. Tapi ningon totap mangarap, anjaha marusaha ase: “Ari patar dearan marimbang ari sadari on.” Halani ai hasabaron on ma hinorhon usaha pananggulangan atap perbaikan, na totap mangajamkon idop ni uhur Tuhanta, “marhitei hasabaron do maluah hosahnima.”

Halani ai hita na porsaya, ningon totap do hita ibagas hasabaron ibagas arti na sasintongni, ase saud hita dapotan haluahon na sadokah ni dokahni, ulang manirpang humbani haporsayaon anjaha ulang mandolei, tapi totap ibagas pangarapan anjaha totap marusaha mangatasi paruntolan na binolusta.

Tonggo: *Tuhan urupi Ham ma hanami bani goluhnami ase totap hanami porsaya Bamu, marpangarapan janah marhorja age sonaha pe paruntolon pakon sitaronon na roh bani goluhnami ase saud hanami dapotan haluahon na hum-Bamu in. Amen.*

HALELUYA NO. 255:2-3

2. Age pe au sai marsik,
hutatap Rajangkin.
Sai roh do ari-ari
pangurupi-Ni in;
Na so paturuton-Ni,
bai parlajouan in,
sai saud paluahon-Ni
au hinopkop-Ni in.

3. Ai seng sompok marsaran,
ganup na milas in;
Hotop dokah taronon,
ganup na borat in;
sai tambah do gogohku,
mamorsan silang in,
huidah do Tuhanku
dohor i lambungkin.

NA IJA IPILIH HAM?

“Sada do na porlu! Ipilih si Maria do rupei sidearan, seng sibuaton ai humbani.”

Lukas 10:42

Mamilih, mararti mambuat haputusan, mararti homa manontuhon sikap. Bani sada-sada panorang laho mambuat haputusan, gati do buei sipilihon. Tapi gati do homa pitah dua do hansa kemungkinanni. Bani keadaan na sonon ma gati “tegang” pangahapan.

Songon na bani ayat sadari on, bani panorang na roh Jesus martamu hu rumah si Marta pakon si Maria, dua hal na taridah kemungkinan sipilihon, ai ma na madear pakon sidearan. I sada pihak sadalan hu bani hasomalan partamueion ibagas masyarakat bani panorang ai, na madear ma ai anggo marugas na tinopot parsirsirhon sipanganon pakon siinumon bani tamu na roh, tarlobih ma ai bani tamu na agak “istimewa.” Tapi i pihak na legan bani panorang partamueion sahali on, sadalan hu bani tujuan parroh ni “tamu” Jesus na roh hu bani si Marta pakon si Maria, dong do hape “keistimewaan.” Keistimewaanni ai ma manaruhkon atap padaskon rupei sidearan, ai ma ambilan malas ni uhur na humbani Tuhan in. Jadi na gabe persoalan ijon, aima antara rupei na madear pakon rupei sidearan. Antara hasomalan laho mangidangi tamu pakon manjalo “siluah” ni tamu. Pakon hata na legan, mamilih horja mangidangi tamu atap sirsir manjalo pangidangion ni tamu na roh.

Gati marporang na dua on bani goluhta ari-ari. Anjaha kenyataan ni gati hita rahanan pitah mangidangi tumang anjaha lang onggga atap lang porlu be iahap hita iidangi tamu na roh in. Halani ai pitah rupei na madear ai hansa dapot hita, anjaha lang parsimada bani rupei sidearan ai.

Ase domu hujon ipagolpa hita, ase bani na manontuhon humbani na pitah dua kemungkinan do hansa, na dear pakon sidearan ai ma pilih hita. Bani panorang parroh ni Jesus Kristus hu bani dirinta laho mamboan ambilan na madear in, parsirsir hita ma dirinta ase iidangi Tuhan Jesus. Ia ma na gabe hasuhutan, anjaha hita ma na gabe tamuei-Ni. Na mamilih hata Jesus, gabe parsimada ma ia bani rupei sidearan ai, anjaha lang be sibuaton ai humbani, legan ma anggo use rupeini na dob pinilihni ai.

Tonggo: *Ham Tuhan Naibata Bapanami, urupi Ham ma hanami laho mamilih pakon manontuhon na patut sipilihonnami. Rupei sidearan na hum-Bamu in ma ipilih hanami, anjaha pargogohi Ham ma hanami ase ulang ipaluah hanami be in. Amen.*

HALELUYA NO. 264:1+3

1. Sada do na porlu bangku,
Jesus bere Ham ma au.
Atap aha na dong bangku,
seng na boi pasonang au.
‘Ge arta ge sangap, ganup habayakon,
seng boi in mamboan au bai hasonangan.
Ai anggo ma dapot na sasada in,
sai malas uhurhu hinorhon ni in.
3. Si Maria usihanku manangihon Hata-Mu;
Sihol ma, ale Tuhanku
hundul au i lambung-Mu;
O Jesus Tuhanku, pasada uhurhu,
paluah ma au
humbani ganup dousangku!
Sai Ham ma ompungan ni ahu tongtong,
sai Ham ma manggoki uhurhu tongtong.

ISE DO JESUS BAMU?

“Nini ma hubani sidea, “Ia hanima, ise do Ahu, nini hanima?”

Mateus 16:15

On do sungkun-sungkun ni Jesus hu bani simbuei, anjaha isungkunhon homa hu bani susian-Ni ai ise Jesus mangihutkon pandapot ni halak atap jolma simbuei, secara langsung isungkunhon Jesus hu bani susian-Ni ai ise do Jesus nini sidea.

Bagei do na boi ibahen hita balosta pasal ise do Jesus, songon pandapot ni simbuei na pinadas ni susian-Ni ai. Tapi age pe sonai balos ni simbuei, tontu legan do balosmu, anjaha legan do balosni susian-Ni ai. Atap ise pe nini hita Jesus, bebas do hita mambahen balosni. Tapi sada hal na pasti, sonaha balosta, songon balosta aima homa Jesus ibanta. Ambah ni ai do homa, pasti lang marosuh Jesus maronjolan bani pandapot ni halak pandapotta pasal Jesus. Lang marosuh Jesus bani halak na mangkatahon “Omei na masak, ai ma gabe sipanganon, ai sonai nini halak sonai ma homa na hatahon.” Tapi na marosuh do Jesus, anjaha ai ma homa na pinido-Ni marhitei sungkun-sungkun on, ase maronjolan bani panandaion, parsauran pakon haporsayaonmu hu bani Jesus, maronjolon hujai ma ham mambere balos ise do sasintongni Jesus nimu. Ise Jesus nimu, mararti songon balosmu ai ma homa Jesus bamu.

Memang boi do ipakei hita pandapot ni halak na gabe bahan pertimbangan banta. Anjaha boi do homa ipakei Jesus panandaion ni halak pasal-Si gabe hitei-Ni mamboan hita manandai Jesus secara pribadi. Tapi ulang lupa, penandaionta secara pribadi marhitei partalarni Naibata banta, ai do na manontuhon. Anggo sonai ise do Jesus nini hanima? Ise do Jesus nimu? Ise do Jesus ningku? Sada balos na topat, ai ma songon na hinatahon ni si Petrus: “Ham do Kristus Anak ni Naibata na mangoluhhon in.” Artini Jesus ai ma Mesias, Sipaluah na sinuruhni Naibata laho pagoluhkon jolma. Sada panandaian, pangakuan janah sada padan do balos on. Itanda janah iakui hita secara pribadi pitah hambani Jesus do hansa hita mangarapkon janah manjalo hagoluhon, sonari pakon magira pe. Balos on lang hambani halak, lang hambani daroh atap daging, tapi hambani Naibata marhitei haporsayaonta do.

Ase tontuhon ham ma sonari, ise do Jesus nimu, ise do Jesus bamu! Pataridahkon ham anjaha hagoluhkon ham ma balosmu ai bani goluhmu ari-ari.

Tonggo: *Ham Jesus Tuhannami, pasintong Ham ma panandaionnami pakon balosnami hu-Bamu. Urupi Ham ma hanami pataridahkon janah mangkagoluhkon na Ham do Sipaluah janah Sipagoluh hanami. Amen.*

HALELUYA NO. 328:1-2

1. Jesus Tuhanku simada au on,
na patorsahon ganup goluhkon.
'Ge pe roh munsuh manosak au on,
Ham batar-batarhin.
Ham Batu Gingging tongon,
Parlingodanku na sai tough.
Togu au hun dalan na golap in,
das hubai na liar.
2. Jesus mardilo goranmu tongtong,
sai roh ma ham na dob kahou dokah.
Ase iapus iluhmu homa,
roh ham na loja in.
Jalo pasangan-Ni in,
porsan ma in lang pala borat,
holsoh ampa horu ni uhurmin,
maronti ma ijin.

MESIAS NA TONGON MARSITARONON

“Hunjia nari ma ipungkah Jesus patugahkon hubani susian-Ni, na maningon laho do Ia hu Jerusalem, anjaha na maningon buei do Ia manaron humbani pangintuai-pangintuai, sintua ni malim ampa ibotoh surat, pala maningon bunuhan do Ia, tapi papuhoon do bani ari patoluhon.”

Mateus 16:21

Dob honsi dong panandaion pakon pangakuan ni susian ni Tuhan Jesus na Kristus Anak ni Naibata na manggoluh in do Ia, lambin ipatugah Jesus do hubani susian-Ni ai na mardomu humbani pangakuan ni sidea ai. Halani ai lambin tangkas ma aha do na sasintongni na maningon masa domu hubani Hamesiason ni Jesus in. Ase ulang holi sintong panandaion hape legan pangarusion ni sidea.

Tangkas do ididah Jesus aha na laho jaloon-Ni anjaha na maningon roh hu bani diri-Ni selaku Mesias in Ia. Tapi anggo susian ai lape tangkas ididah sidea pasal ai, sonaha ma sasintongni proses Hamesiason ni Tuhan Jesus.

Ididah hita humbani ayat na i atas in, pala tolu hali ipakei hata “Maningon.” Maningon laho do Ia hu Jerusalem; maningon buei do Ia manaron: pala maningon bunuhon do Ia. Hata maningon mararti lang boi lang. Lang dong na legan. Pitah laho hu Jerusalem, marsitaronon, pakon ibunuh; ai do hansa dalan Hamesiason ni Jesus. Via dolorosa, dalan panaronon, on do na irencanahon Naibata domu hubani Hamesiason-Ni. Sadar do Jesus na gabe “Juak-Juak” ni Naibata na marsitaronon do Ia laho paluahkon jolma. Domma ibagahkon Naibata pasal on humbani Padan Nabasaia nari marhiteion ni Nabi Jesaya.

Ase hunjon ididah hita, sedo hape marhitei hamuliaon pakon hasangapon ni dunia on, lang marhitei harajaon pakon hamonangan secara politik Hamesiason ni Jesus in, tapi maningon manaron anjaha maningon ibunuh do Ia. Pasal on ningon tangkas ibotoh susian ai pakon sagala na porsaya bani panorang on, ase kecewa sidea pakon hita i pudian ni ari.

Halani Naibata do na manotapkon rencana pakon proses Hamesiason ni Jesus, sintong ma Ia Kristus Anak ni Naibata na manggoluh in. Ase lang hape sitaronon na gabe ujungni, lang homa hamateian na gabe dobn. Tapi hagoluhan do marhitei na ipapuhu Naibata Ia bani ari patoluhon. On do na gabe malas ni uhurta, na lang pala “marsitaronon” be hita, na lang pala “bunuhon” be hita bahen haluahonta. Porsaya ma hita na domma maluah hita humbani sitaronon pakon hamateian na sadokah ni dokahni, hinorhon ni sitaronon pakon parmatei ni Jesus Kristus na gabe Mesias banta.

Tonggo: *Tarima kasih ma Bamu Tuhan, halani panaronon pakon hamateian-Mu na maningon masa, laho paluahkon hanami. Ajari Ham ma hanami marmalas ni uhur pakon martarimakasih bani panaronon pakon parmatei-Mu. Amen.*

HALELUYA NO. 241:2-3

2. Malas do tong uhurhon,
bani Jesus na bujur.
Pasirsirhon hagoluhon,
bangku na i hamagouan;
Haganupan dousangkin,
sai isasap Jesuskin.

3. Malas do tong uhurhon
ai parrupeu au tongon.
Bani arta na maharga,
pinarbagah ni Tuhanta;
Bai ganup na bujur in,
mangirikkon Jesus in.

ULANG LUPA HITTA

“Jadi iarahkon si Petrus ma Ia, ihata ma Ia, nini ma: Idop ma uhur ni Naibata Bamu Tuhan! Ulang ma masa ai Bamu!”

Mateus 16:22

Domma pala tolu hali ihatahon Tuhan Jesus pasal sitaronon-Ni, sonai pakon parmatei-Ni bani ganup susian-Ni pakon jolma simbuei. Tapi bumbang ope uhur ni susian ai pasal na hinatahon Jesus bani sidea. Age pe namin domma iakui si Petrus Tuhan Jesus aima Anak ni Naibata na manggoluh. Lang tarjalo uhurni, anggo Anak ni Naibata maningon manaron, janah matei. Ambah ni ai homa anggo Jesus uhurni ibagas na marsonang-sonang do. Mabiari tumang si Petrus anggo ijalahon Jesus ganup sitaronon-Ni ai. Domu hujai do ase ihatahon si Petrus. Idop ma uhur ni Naibata Bamu ulang ma masa ai.

Domu hujai do homa ibagas goluh hita jolma, gati hita mangambati sura-sura pakon rencana ni Naibata. Halani sihol uhurta, sura-suranta ma namin na mardalan, halani ai do iahap hita na madear, janah cocok bani kemauanta. Hape anggo bani Tuhan domma suhar ai. Janah gati homa hita lupa bani hata ni Tuhan Jesus, pasal rencana-rencana haluahon pakon malas ni uhur na pinadas-Ni marhitei Ambilan na madear. Janah gati homa hita mabiari bani sagala sitarononta, bahkan bani hamateian ni goluhta. Tapi marhitei sitaronon pakon parmateini Kristus Jesus, mangkorhon haluahon pakon malas ni uhur hita marsitaronon. Porini roh sitaronon, na boi iporsan do ibere hu banta ibagas goluhta on. Porlu hita tulimat, bani na marhorja hita mangidangi i kuria in. Ra do roh na mangambati horja ai, humbani dirinta sandiri, misalni: humbani inangta, niombahta pakon keluarga terdekat. On pe termasuk do homa parlajouan banta bani na mangirikkon Jesus. Parlajouan sisonon ai mahol tumang do hita mangarusi, memang hata holong do na binahen ni keluarganta ai, tapi anggo domma lepak. Marhiteihonni na ingat hita janah jaga bani parlajouan na bersifat “mangelek” boi ma hita maluah humbani sidingni si bolis pangagou in.

Sai gabe pagori ni Kuria pakon rumah tangga na ingat ma hita bani podah ni Tuhan Jesus Kristus.

Tonggo: *Gati do Tuhan, hanami songon goluh ni si Petrus, na mangambati horja pakon harosuh ni uhur-Mu na mardalan ibagas Kuria-Mu sonari. Halani ai Tuhan Ham ma na manorangi uhur pakon pingkirannami, ase boi songon na hinarosuhkon-Mu hanami tong. Amen.*

HALELUYA NO. 107:3+6

3. Hupatudohkon dalam in,
sisimbilonnima;
Ganup geduk ni uhurmin
sipaubahonnima;
‘se tong pansing ma tonduymin,
ronsi rotap ni hosahmin.
6. Na manghargahon hosahniin,
in do mansedahonsi;
Sagala na marnalang in,
in do pagoluhkonsi.
Na so mamorsan silang in,
na so talup be Bangku in.

KEJUTAN

“Jadi dob ihatahon sonai, ipagogoh ma sora-Ni mandilohon: “Lasarus, kaluar ma ho!”

Johannes 11:43

Bani panorang parpudi on popular do ibogei hita istilah “Kejutan.” Bani tahun 1980 Laksamana Sudomo mambahen kejutan bani hasoman na korupsi i seluruh Indonesia. Mengakibatkan tarontokan pingkiranni hasoman na menyeleweng, halani horja kejutan na binahen ni Sudomo. Pakon pondok, horja-horja hagolapon domma isonggoti, bahkan ibere uhum sesuai bani horjani sandiri.

Sonai do homa sanggah ni goluh ni Tuhan Jesus na ijia, Jesus mambahen kejutan, bani kuasa ni hamateian ni si Lasarus. Das do homa bani panorang hamateian sonari. Domma rotap hubunganni hamateian bani na manggoluh, lang marpardomuan be. Bani parmateian ni si Lasarus manrajai pingkiran ni sidea na dua. Tapi marhiteihon parroh ni Jesus Kristus hu tongah-tongah ni sidea, ibagas na berwibawa homa, mamberi kejutan bani na manggoluh sonai pakon na matei. Maria pakon Marta na marpusok uhur hinan gabe marmalas ni uhur, janah martenger ni uhur bani kehadiran ni Jesus ai. Si Lasarus na dob matei hinan gabe mulak manggoluh use.

Haganup do hita na porsaya mangakui hagogohon ni Jesus, bani sagala tinompa-Ni. Tunduk do hu Bani haganup, termasuk kuasani hamateian ni jolma sonari. Kejutan na binahen ni Jesus bani si Marta pakon si Maria, aima martujuan mambangun tenger ni uhur na dob marosak hinan. Kehadiran ni Jesus aima melumpuhkan kuasa ni hamateian, janah pajongjongkon goluh na baru bani si Lasarus. Marhitei na dob monang Jesus bani parpuho-Ni ai, ai do na gabe tenger ni uhurta homa laho mandompakkon hamateian ni goluhta.

Ai domma italuhon Jesus kuasa pakon sorod ni hamateian in. Ai do ase ihatahon Paulus bani suratni: O hamateian ija do sorodmu? O hamateian ija do hamonanganmu? Domu hujai do homa hita porlu martenger ni uhur, age pe ibolus hita hamateian, lang be hamateian ai ujung ni goluhta, tapi parpuhoon na humbani kuasa ni Jesus Kristus do.

Hita na dob menikmati hasil kejutan ni Jesus, lang pala be mabiar. Pakei hita ma gogoh pakon wibawa ni Jesus ibagas goluhta ari-ari, laho manlawan naborit, pusok ni uhur. Kuasa pakon kejutan na humbani Jesus do sinjatanta na ampuh laho manaluhon ai.

Tonggo: *Domma ipataridahkon Ham Tuhan kuasa-Mu bani sab dunia on, age bani keluarganami pe. Halani ai pargogohi Ham ma tongtong hanami laho manlawan haganup paruntolan ni goluhnami. Amen.*

HALELUYA NO. 346:2-3

- | | |
|---|---|
| 2. Ai domma sasap dousa in
ibaen na matei Jesus
Ai seng be jujuron ni in,
ibaen holong ni Jesus
Dear ni in barita in,
malas ni uhur banggal in.
Sai ipuji uhur hin Jesus, Jesus, Jesus. | 3. Na parngit bani goluhkon,
ibuat Tuhan Jesus.
Antong ganup hasomankin,
podas ma roh bai Jesus.
Dear ni in barita in,
malas ni uhur banggal in.
Sai puji uhurhin, Jesus, Jesus, Jesus. |
|---|---|

PASSION

“Mulai humbani ari ai manriah ma sidea laho mamunuh-Si.”

Johannes 11:53

Dong do rapot ni Jahudi na ijia, ai ma Sanhedrin. Anggotani humbani dua golongan Saduki pakon Parisei. Malim bolon bai panorang ai, aima Kayapas. Haganup na masa na binahen ni Jesus, marhitei halongangan ai ma na marlawanan bani pandapot ni Parisei pakon Saduki, tarlobih ma horja bani ari Sabat. Haganup horja ni Jesus ilaporhon sidea ma ai bani Sanhedrin, ase rapat ai ma mamutushon, aha na sihol bahenon ni sidea.

Marhitei horja ni Jesus lambin talar Harajaon ni Naibata Bapa, janah buei halak na mangirikkon-Si, sonai pakon mangkaporsayai-Si, tarlobih ma ai marhitei na ipapuhon Jesus si Lasarus humbagas tanoman. Sonai homa na ipagoluh Jesus garama na i Huta Nain. Tapi lambin gijang ma ringgas pakon sogam ni uhur ni Parisei mangidah horja ni Tuhan Jesus. Ujungni mabiar ma anggota Sanhedrin mangidah situasi ai. Anggo lang ibendung/iolati horja ni Jesus, lambin bahat ma na porsaya, on ma pingkiran ni Parisei pakon Saduki.

Hurang homa kuasa pakon wibawa ni Parisei, termasuk bani segi politik. Halani ai ipakei sidea ma panorang na pondok laho manrapot, ai ma rapot banggal. Jadi dapot ma hasadaon ni riahi ni sidea mulai ari ai laho mamunuh Tuhan Jesus. Halani dearan ma matei sahalak manghopkop bangsa, daripada magou haganup na mabuei ai. Keputusan rapot Sanhedrin laho mamunuh Jesus lang halani dong salah pakon hajahaton ni Jesus, tapi demi kepentingan pribadi do hansa.

Tapi age pe sonai seng sura-sura ni sidea mardalan ijai, tapi rencana ni Naibata do, termasuk bani parmateri ni Jesus. Sitaronon pakon parmateri ni Jesus mangkorhon jaminan do ai banta, aima jaminan haluahon pakon jaminan malas ni uhur. Marhitei ugah-Ni malum iahap hita, marhitei parmateri-Ni gabe dihutjolma na buruk ai iparsilangkon. Janah marhitei parpuhohon-Ni ai gabe margoluh na baru homa hita i lobei-Ni.

Sitaronon pakon parmateri ni Tuhan Jesus, das bani panorang on do mangkorhon malas ni uhur pakon haluahon bani na porsaya Bani.

Tonggo: *Ham Tuhan Naibatanami, ipasaud Ham do padaskon haluahon bani dunia on marhitei parmateri Anak-Mu in. Banggal do halongangan na binahen-Mu, janah i toruh ni kuasa-Mu do haganup na dong in. Sai harosuh-Mu ma tongon ihorjahon pakon ihagoluhkon hanami, ibagas ari-arinami. Amen.*

HALELUYA NO. 61:6+8

6. Tarima kasih ningku
Bamu, ale Tuhan.
Parmateri-Mu, Tuhanku,
mambaen au on sonang.
Ai daroh-Mu madurus,
halani dousangkin.
Sai jalo au, o Jesus,
bani parmaterihin.

8. Sai Ham parlingodanku,
Pangapoh uhurhin.
Bai rotap ni hosahku,
bani parmaterihin.
Ijin ma dingatonku
ganup tinaron-Mu.
Na timbul do tuahku
ibaen parmateri-Mu.

NA MARHARGA ANJAHA NA MISBOU

“Jadi ibuat si Maria ma sakati minak nardus na maharga anjaha na so maragu; iminaki ma nahei ni Jesus anjaha jambulanni do ibahen manlapui. Jadi igoki misbou ni minak ai ma rumah ai.”

Johannes 12:3

Marbagei-bagei do sihol ni uhur ni jolma i tanoh on romban humbani aha na binotohni ampa aha na adong bani. Janah marpala-pala do jolma in mamakeihon parbinotohan ampa hinadonganni ai sonaha gendo apala manonjol ia atap goranni. Bahkan ra do jolma in manrugirugi bani duit, asal ma dapot na ibagas uhurni, marsangap, tarbarita. Bani na deba das humbani na manrugihon jolma ampa mangagouhon jiwa ni halak na legan pe itaronkon, asal ma saud sura-sura ni ai.

Bani ayat on, legan tumang keadaanni pakon na isobut i atas in, ijon ipataridahkon sada kesaksian na jenges tumang laho patuduhkon kesetiaan humbani Tuhan Jesus. Halani domma ibotoh, ididah anjaha iahapkon anjaha ihaporsayai bahasa Tuhan Jesus do sibere hagoluhon bani. Jesus do na mambere malas ni uhur bani sanggah na marsitaronon ia. Haganup pusok ni uhur domma ipasabou anjaha ipalunggar Tuhan Jesus. Hinorhon ni ai tubuh bani sada pandirion na tegas, atap aha pe na masa, Jesus ma hasomani.

Ipaorod, ipangosngos anjaha lambin iondoskon si Maria do dirini humbani Tuhan Jesus. Ibahen si Maria do penghargaan na ginjang tumang marhitei na maminaki Tuhan Jesus. Ibuat si Maria do sakiti minak nardus na marharga anjaha na misbou. Ilapuhon ma ai bani nahei ni Tuhan Jesus jambulanni sandiri do ibahen manlapuhon.

Bani Padan Nabasaia, ipakei do minak na marharga ai laho maminaki Raja, aima songon na sinuruhni Naibata si Samuel maminaki Si Daud sanggah na bingkat Raja ia. (1 Samuel 16:13) Ipakei do Homa minak ai laho manghormati tamu terhormat; sonai homa laho patuduhkon holong ampa malas ni uhur (Psalmen 23:5).

Hunjon taridah na arga ai do iondoskon ni si Maria hu bani Tuhan Jesus laho pataridahkon holong ni bani Jesus. Ipataridahkon si Maria do homa age toruh uhurni, ai jambulanni do ibahen manlapui nahei ni Tuhan Jesus. Horja na madear, na tama anjaha na positip do horja ni si Maria marhitei horja ai, pakon pondok, sedo horja na soya horjani si maria ai. Igoki misbou ni minak aima rumah ai. Patuduhkon parsaoan na manggoluh do sagala parsaoan na sintong-sintong pakon Tuhan Jesus bani bagei-bagei ni horja itongah-tongahni Kuria-Ni, anjaha igoki uap na misbou ibagas parsaoan ampakon Tuhan.

Jumpah do nani keadaan na sonai ai bani halak Kristen bani panorang on?

Tonggo: *Ham Tuhan Jesus Tuhannami, urupi janah pargogohi Ham ma hanami ase lambin ibotoh hanami pasangapkon Ham marhitei goluh ampa parsaoannami. Amen.*

HALELUYA NO. 340:1+4

1. Huondoskon bani Jesus
haganupan diringkon.
Ia do pasangaponku
sadokah bai goluhkon.
Huondoskon ma, huondoskon ma,
bani Jesus Sipaluah huondoskon ma.
4. Huondoskon bani Jesus
haganupan gogohkin.
Holong pakon kuasa-Ni,
in ma manramotkon au.
Huondoskon ma, huondoskon ma,
bani Jesus sipaluah huondoskon ma.

HOSIANNA

“Hosianna bani Anak ni si Daud! Pinasu-pasu ma na roh ibagas goran ni Tuhan. Hosianna ma i nagori atas!”

Mateus 21:9b

Marodoran na ganjang do Tuhan laho masuk hu Jerusalem, songon sada Raja. Mangidah keadaan ai aha pe lang na suang, ai ganupan do marolob-olob haganup dihut ambil bagian, dong na mambuat hiuoni, na mambuat ranting ni hayu lao mangalo-alo Raja na roh in pala do longang parJerusalem mangidah na masa ai. Marsaksi do simbuei paboa Nabi do na roh ai.

Marsurak-surak simbuei in manghatahon Hosianna! Artini selamat datang, horas anjaha na usih hunjai. Marhitei hata pakon pambahenan ijalo janah ialo-alo simbuei in hape Tuhanta Jesus. Pambahenan na madear tumang do ai! Patut sonai age panjalonta bani Raja na hun Nagori Atas ai. Ia do Raja na manghopkop hita.

Anggo na paihut-ihut pambahenan ni simbuei ai, humbani sidea do use mangkatahon ase iparsilangkon Tuhan Jesus. Lang dokah tahan hasaksion ni sidea, lang barani sidea torus mangkatahon paboa Jesus aima Raja pakon Nabi.

Bani panorang on porlu pareksaonta hadirionta, sibar sonaha hasaksianta ma pasal Jesus, Tuhanta in. Lang nani pitah tongkin hansa ra hita manjalo Jesus? Jesus na mardalan dompak Silang pakon Golgata, Ia do homa Raja na roh ibagas goran ni Tuhan in. Halani ai age sadihari pe ulang lang dihut hita manjalo pakon manaksihon-Si. Hosianna! Selamat datang ninta bani ganup panorang bani Jesus, Rajanta in. Sirsir do Ia manohu hita atap pe ija hita.

Tonggo: *Hosianna ma Bamu Tuhan Jesus! Roh ma Ham tongtong hubennami, ai ibotoh hanami Ham do Tuhan janah Rajanami, sipaluah hanami. Amen.*

HALELUYA NO. 30:2+7

- | | |
|---|---|
| <p>2. Hosiana! Roh ma Ham,
das hubagas uhurnami.
Na mangalo-alo Ham,
ale Jesus Tuhannami!
Malas uhurnami in,
anggo masuk Ham hujin.</p> | <p>7. Hosiana! Anak ni
Naibata na jadi jolma.
Tohu ma Kuria in,
ase sai tongtong martuah.
Sangap bai goran-Mu in,
sadokah ni dokahni.</p> |
|---|---|

DAMEI MA BANI NASIAM

“Jadi sanggah na mangan ai sidea, ibuat Jesus ma ruti, ipasu-pasu ma, iponggoli anjaha ibere ma hubani susian-Ni, lanjar ihatahon, “Jalo hanima ma, anjaha pangan ma, daging-Ku do on!”

Mateus 26:26

Sanggah na rap mangan sidea, bani panorang Hari Raya Paskah, Jesus pasirsirhon sipanganon bani susian-Ni. Ibuat Jesus ma ruti pakon anggur. Paima iondoshon ai hu bani susian-Ni, parlobei do Jesus martonggo pakon martarima kasih hu bani Naibata, anjaha ipasu-pasu ma sipanganon ai. Lanjar ihatahon ma: Jalo hanima ma, anjaha pangan ma, daging-Ku do on. Dob ai ibuat ma panginumai ai, ihatahon ma tarimakasih, ibere ma ai hubani sidea, lanjar ihatahon: Haganup ma hanima manginum hunjin! Ai daroh-Ku do on, daroh parpadanan, na niuseihon manghopkop buei jolma, bahen hasasapon di dousa.

Ibotoh Jesus do aha na porlu bani susian-Ni, halani ai itawarhon do hubani sidea harsirsiron laho manjalo, ulang mardua-dua uhur sidea bani na manjalohon ai. Sonaha hita mangankon sipanganon, ai ma gabe gogoh pakon malas ni uhur marhitei na jumpahan gogoh na baru pakon pangarapan banta. Artini ai, porlu tumang ihaloguhkon hita panghopkopon ni Jesus na matei bani hayu parsilang laho manobus dousanta, ase parsimada hita bani haluahon in. Haganupan ai, pitah halani idop ni uhurni Naibata do, sedo halani dear ni gabeita ilobei ni Naibata.

Ijin ihagoluhkon hita panghopkopon-Ni ai, lanjar panorang ai ma homa buha matani haporsayaonta mangidah haluahon in. Boi ma hita margogoh manoruskon pardalanan ni goluhta. Totap ope itawarhon Naibata hubanta idop ni uhur-Ni marhitei Jesus Kristus na manaktakhon parpadanan na mapansing, ai ma Horja Banggal Napansing. Tontu ai ma gabe parhiteian ni Naibata laho paluahkon hita gabe martuah janah manggoluh sonari pakon mangira.

Tonggo: *Ham Tuhan Naibata, tarima kasih pakon puji-pujian ma isombahkon hanami hu-Bamu, halani ibere Ham do na porlu bannami gabe martuah pakon manggoluh hanami marhitei Jesus Kristus Tuhannami. Amen.*

HALELUYA NO. 132:1+2

1. Ai ambit lang do Ham,
parholong atei Ham
huja ma au?
Halani holong-Mu
ampakon layak-Mu,
hu surga au.
2. Tarima kasih ma
Bamu, o Naibata,
parlayak Ham!
Sibahen dalan in
marhitei Jesus in
hu surga in.

PANGKORHON NI DODING

“Jadi dob idodingkon sidea doding puji-pujian ai, luar ma sidea laho hu Dolog Jetun.”

Mateus 26:30

Bani sada panorang sada dakdanak Sikolah Minggu marumur 8 tahun, itadingkon orang tuani do ia modom i rumah sahalaksi bodari, jadi tarpuho ma ia anjaha mabiar halani golap do i rumah ai. Taringat ma ia hata ni guru Sikolah Minggu: Anggo mandoding halak Kristen gabe daoh do habiar. Jadi mandoding ma ia doding Sikolah Minggu na dob iajarhon guruni, gabe seng be mabiar ia, halani botul-botul do na humbagas uurni doding ai.

Tuhan Jesus pakon susian-Ni ai mandodingkon doding puji-pujian. Dob ai laho hu Dolog Zetun. Jesus botul-botul laho mandompakkon sitaronon-Ni, marhitei tangkapon anjaha parsilangkon. Tangkas do iahapkon doding ai gabe sada gogoh Bani laho mandompakkon sitaronon na parngit in, ai nini do hubani sintua-sintua ni malim pakon pangintua-pangintua ai, na roh manangkap-Si: Anggo Ahu do na pinindahan nasiam, tangkap nasiam ma! Tuhanta sandiri domma margogoh anjaha manaluhon sitaronon, gepe hita do namin talup manaron ai.

Sonaha do nani hita halak Kristen. Ai lang patut ma hita martarimakasih bani Tuhanta na manghopkop hita? Domma dihut ham mandodingkon doding puji-pujian bani Naibata humbani bulat ni uhurmu?

Jadi gabe sada Gereja na etek-etek ma keluarganta na gati tartangar doding ni halak Kristen pakon na mambasa Hata ni Naibata, ase lintun munsuhta. Nini Martin Luther: Lintun do sibolis manangar doding ni halak Kristen halani mabiar anjaha majangin tumang do pangahapni.

Tonggo: *Ham Bapanami, urupi Ham ma hanami mandodingkon puji-pujiannami hu Bamu, anjaha pargogohi Ham ma hanami na laho manjumpahkon paruntolannami. Amen.*

HALELUYA NO. 200:2+5

2. Sai puhoi Ham uhurhu,
mandodingkon gogoh-Mu.
Ampa idop ni uhur-Mu,
ronsi halayakon-Mu;
Ai sonai do isaksihon
tonduy pakon angkulangku.
Halanin hupuji do
Ham marribu hali lo.
5. Sai patoguh Ham uhurhu
pasangapkon goran-Mu;
Ampa haporsayaonku,
lambin tambah ma Bamu;
Sai pamasuk Ham, o Tuhan
tonduyhin bai hagoluhan.
Mandodingkon Ham ijin
sadokah-dokahni in.

PUHO MA!

“Dob ai laho ma la manjumpahkon susian-Ni ai, nini ma dompak sidea, “Nunutonnima ope modom ampa marsaran? Tonggor ma, domma dohor panorangni, ondoshononkon ma Anak ni Jolma in hu tangan ni pardousa.”

Mateus 26:45

Bani pasukan tentara na mandompakkon munsuh domma sirsir haganup parugas. Anjaha sikap ni sidea pe domma gopas, tagam, puho menghadapi munsuh ai. Seng dong na lansei atap na dolnat. Sonai pakon sikap ni sidea laho hu parporangan domma dong paraturanni.

Lobih humbani cara tentara ai do caranta marporang menghadapi munsuh, halani munsuh ni hita halak Kristen lang taridah, anjaha bani ganup panorang do mangonggopi hita.

Tuhanta bani panorang on menghadapi munsuh marhitei na sihol tangkapon anjaha parsilangkonon la ronsi marutang hosah. Halani ai sinjata na ipakei Tuhanta ai ma “Tonggo” alat komunikasi hu bani Naibata ase margogoh menghadapi munsuh.

Sada kapal torbang na i udara ningon adong do komunikasi hu menara ase boi ia selamat bani pardalananni. Sonai do homa hita ningon ipakei hita do tongon na gabe sinjata banta menghadapi munsuhta.

Tuhan Jesus mambahen partonggoan sanggah lape sogop Bani sitaronon. Girah sogod martonggo do la anjaha seng marnamangadi. Tapi sada pusok ni uhurni ai ma: Susian-Ni ai sandiri lalap tarpodom, seng puho age pe dohor ma panorangni Tuhan Jesus sihol ondoshonon. Lang sisada sitaronon sidea age pe domma dokah rap sidea. Sonaha do nani hita bani panorang passion on, dihut do nani puho, gopas, sirsir menghadapi munsuh na sihol roh? Atap modom do hita bani partonggoanta? Atap pe dob masa do sitaronon ase na ompot torus-torusan martonggo, dob ai tarpodom use? Ulang sonai sikapta, ase ulang talu bahenon ni munsuh ai. Tapi ningon ahapkononta tongtong na dohor do imbang ai laho manggongopi hita. Halani ai Jesus ma bahen hita pangjamanta.

Tonggo: *Ham Bapanami, pargogohi Ham ma hanami bani hagalekonami, anjaha pamonang Ham ma hanami, mandompakkon munsuhnami. Amen.*

HALELUYA NO. 114:1-2

1. Gopas parugasnima
ganupan bala ni
Tuhanta Jesus Kristus
hu parmunsuhan in.
Ai seng tarbaen lang monang
manlawan malah ho;
Ai munsuh ni Tuhanta
maningon talu do.
2. Tangihon pandilo-Ni
hu parmunsuhan in;
Irikkon ma hata-Ni
mangimbang dousa in.
Tuhanmu hasomanmu
manahan munsuh in.
Tongtong sai hatengerhon
Tuhanta Jesus in.

MANINGON SAUD DO SURA-SURA NI NAIBATA

“Tapi sonaha ma saud na hinatahon ni surat in, na mangkatahon, paboa na maningon masa do sonon?”

Mateus 26:54

Dalan silang na sihol sidalanon ni Tuhanta, ai ma pasaudkon rencana ni Naibata (Jesaya 50:6). Bani panorang na sihol ondoshonon Anak ni Jolma in hu tangan ni parjahat, sedo na so boi namin italuhon. Tapi ase lambin talar do ujung ni sitaronon ni Tuhanta. Itonggohon Tuhanta ase isalpuhon panginuman ai hum Bani, tapi ipangindohon do ase “uhur ni Naibata ma na saud.” Jadi sitaronon na sihol sidalananni Tuhanta lang pala songon paksaan ai bani diri-Ni, halani manggoluh do Ia bani rencana ni Naibata.

Gati do laho hita papangkashon jambulanta hu bani tukang pangkas. Age dompak ja pe iputorhon ulunta dear do uhurta, halani tangkas do ibotoh hita na laho padearhon do ai. Sonai do age hita, manggoluh ma hita bani rosuh ni Tuhanta, ulang anggo roh sitaronon atap paruntolon mintor lang ra be hita pasaudkon rencana ni Naibata, ai na laho padearhon do maksudni Naibata ijai.

Gati do homa itonggohon hita: Sai saud ma harosuh ni uhur-Mu i nagori tongah songon i Nagori Atas. Jadi anggo lang be songon na ibagas uhurmu be mardalan sura-suramu, lang sonang ham. Tapi anggo Tuhanta iberehon do diri-Ni hu hamateian laho manghopkop hita pardousa, laho pasaudkon rencana ni Naibata.

Patut ma hita mangkatahon tarima kasih halani hasirsiron-Ni manaron na sasintongni hita do manaron ai. Patut hita manolsoli ganup hajahatonta na ihorjahon hita sehari-hari, ladung, uhur haut, mamunsihi hasoman ronsi mansuhuni hisap-hisap ni daging pakon na legan, ganupan do ai mamparsilangkon Tuhanta. Halani idop ni uhur Naibata itobus hita humbani hajahaton, ase manggoluh hita ibagas Ia.

Tonggo: *Ham Bapanami, urupi Ham ma hanami mamilangi hajahatonnami, na mambaen marsitaronon Ham halani dousanami. Tarima kasih Tuhan halani bangga ni idop ni uhur-Mu in. Amen.*

HALELUYA NO. 64:3

3. Na ra do au, alo Bapa,
humbai gok ni uhurhu
padas rosuh-Mu, ‘ge huja,
ai gok Bamu tumang do,
O holong ni atei-Mu in!

Tor aha ma usihannin,
na songon Ham margogoh?
Ibere Naibata hape
Anak-Ni lao manaron in,
taronon ni na magou.

MANIMBILI LADUNG

“Tapi anggo sintua ni malim ai ampa haganup anggota ni Pangadilan Tinggi ai mangindahi hasaksian ladung do dampak Jesus ase boi la marutang hosah.”

Mateus 26:59

Dong do piga-piga hal na mandorong halak mangindahi hasaksian ladung dampak hasomanni deba ma ai laho manutup-nutupi hasalahan ampa hahuranganni sandiri. Deba ma ai laho mansalahkan hasoman na sabotulni lang marsalah. Lang ra barang maila mangakui hasalahan ampa hahuranganni jadi laho mamintori diri ipindahi ma hasaksian ladung. Deba halani domdom, subil pakon latei ni uhur dampak hasoman. Humbani dalan na sintong, na bujur lang tarkahuasi halak ai, jadi isari ma hasaksian ladung laho mandabuhkon, pasedahon goran ampa martabat ni halak ai. Hasaksian ladung, ampa sagala na ginoran ladung, bani parsahap ampa pambahenan, lang iharosuhkon Naibata. Na manlanggar Titah ni Naibata na pasiahkon “Ulang ho ra manaksihon hata na so tongon marimbang hasoman jolma.” Ai marhitei hasaksian ladung ai boi do tarjadi ragamni hageoron ampa sitaronon i tongah-tongah ni masyarakat.

Sonaha dong iahap ham dousa hasalahan ampa hahuranganmu bani parsahap, ampa pambahenan dampak hasomanmu, sonai homa age ibagas na mandalankon tugas ampa horjamu siganup ari? Ulang mabiar atap maila ham mangakui janah mansopotkon ai i lobei ni Naibata, ampa i lobei ni hasomanmu. Patoruh ham ma uhurmu, pindo ham pangurupion ni Naibata, ase tarbahen ham marpambahenan na madear, na sintong hunjon-hunjanan. Sonai homa anggo dong salah ni hasoman bamu, podas salpuhon ham ai humbagas uhurmu, ulang mardomdom, ai ham pe dong salah ampa hahuranganmu. Malas ma uhurmu bani pambere ni Naibata bamu ulang simburu barang subil tapi ibagas tonggo pongkutkon ham ma horjamu parhiteianni Naibata mambere pasu-pasu bamu. Anggo sonai daoh ma ham humbani sipindahi hasaksian ladung dampak hasoman songon sintua ni malim ampa anggota ni Pangadilan Tinggi ai ijia dampak Jesus.

Sonaha dong iahap ham ibahen hasoman hasaksian ladung pasal ham? Ulang baloshon ham na jahat, tapi marhitei pambahenan na madear pasiphon nasiam haotoon ni halak na hurang uhur. Ai idop ni uhur do ai, anggo tahan do halak manaron sitaronon halani pambahenan na madear, ai ma na hinarosuhkon ni Naibata (1 Petrus 2:19-20).

Tonggo: *Urupi Ham hanami Tuhan, ase sirsir marsisasapan dousa janah pongkut bani horjanami bei mandalankon hasintongan na gabe parhiteion-Mu mambere pasu-pasu bannami ase ulang gabe sipindahi hasaksian ladung hanami dampak hasomannami. Amen.*

HALELUYA NO. 220:2+4

2. Rap ma hita manadingkon,
uhur subil na mabajan,
mambaen parsirangan in;
Kristus in do pardomuan,
na patotap parkawanon;
sadokah-dokahni in.

4. Halanin sai na horjahon,
uhur marsihaholongan,
bai ganup hasoman in.
Hapintoran, hasintongan,
haliharon, hadameion,
in ma tong padanta in.

SONGON NA HINAHATAHONMU AI MA TONGON

“Nini Jesus ma hu bani, “Songon na hinahatahonmu ai ma tongon! Tapi Huhatahon ma bani nasiam: Humbani sonari nari, idahon nasiam ma Anak ni Jolma in hundul i siamun ni Pargogoh in, anjaha roh i atas ni hambun ni langit.”

Mateus 26:64

Ganup Minggu do hita jongjong i Gereja manaksihon haporsayaonta dampak Naibata Bapa, Jesus Kristus, Anak ni Naibata na sasada in, ampa Tonduy Napansing. Domma nani sintong pangakuanta ai? Anggo sonai mase dong ope hun tongah-tongah ni halak Kristen in na mambahen maragu haporsayaonni marhitei na mardatu, mangalop tuah hambani simagot ampa begu ni na dob matei, manusur sahala ni ompungni, sonai homa na mamakei ajimat-ajimat? Mase homa dong na patumpu-tumpu arta dunia marhitei dalan na lang patut ampa na mangguruhon kebatinan laho paluah dirini hambani persoalan ni goluhni? Anggo sonai ope tontu pangakuan ni pamangan ope hansa pangakuanta ai, atap pengakuan na manguji-uji dampak Tuhanta. Tapi atap na sonaha pe pangakuanta, ai na sintong hambani haporsayaonta atap na manguji-uji dampak Tuhanta, balos ni Tuhan Jesus hubanta: “Songon na hinatahonmu ai ma tongon.”

“Tongon! Ia do Kristus ni Naibata, Mesias, Sipaluah na sinuruh ni Naibata hu dunia on laho paluahkon jolma pardousa in hambani gomgom ni hamateian. Ibuktihon do ai marhitei parmateri-Ni ampa parnaik-Ni hu Nagori Atas. Janah sihol patalaron-Ni ma hasintongan ni ganup hata ampa pambahenan-Ni ai bani parohh-Ni na parpudi, ibagas hagogohon, hamuliaon ampa hasangapon, laho manguhumi jolma na manggoluh age na dob matei. Tapi lang maluah halak na mangkuhon Jesus pitah bani pamangan. “Ai lang haganup halak na mandilohon: Tuhan! Masuk hu Harojaon Nagori Atas, tapi pitah na mangkorjahon harosuh ni Bapa in do.” Artini ai, maningon hagoluhkononta do pangakuan haporsayaonta ai bani goluhta siganup ari, ase dihut hita maluah. Maningon saksihononta do pangkuanta ai bani ganup goluhta i tongah-tongah ni dunia on, bahen hasangapon ni Tuhanta. Anggo sonai hatahonon ni Jesus ma banta: “Songon hinatahononmu ai ma tongon, maluah ma ham!” Tapi anggo manguji-uji do atap pangakuan bani pamangan do hansa hatahonon ni Jesus ma banta, “Songon na hinatahonmu ai ma ham hona uhum sadokah ni dokahni!”

Domma sintong pangakuanta ai bani “Hata Haporsayaon” ai. Hagoluhkon hita ma tenger ma uhurta domma sirsir banta sortali hagoluhan sisadokah ni dokahni in, i lambung ni Naibata, Pargogoh na so tarimbang in.

Tonggo: *Marhitei Tonduy Napansing in, Ham Tuhan Naibata, pargogohi Ham ma hanami laho mangkaporsayai Ham ampa mangkagoluhkon Hata-Mu, ase sintong panaksihonnami bani Anak-Mu Tuhan Jesus Kristus Sipaluahnami. Amen.*

HALELUYA NO. 213:3

3. Gati huparnalang, o Tuhan,
Ham na pagoluh tonduyhon;
Mabiar au lao manaksihon,

Ham na manghopkop au tongon;
Hupuji idop uhur-Mu
tarlobih holong atei-Mu.

HAONDOSANTA

“Lanjar nini ma, “Ham Jesus, ingat Ham ma ahu, anggo das ma Ham bani Harajaon-Mu.”

Lukas 23:42

Somalni anggo halak ibagas sitaronon na borat, seng parduli be bani situasi sekitarni, atap seng sompat be mamingkirhon na legan sobali dirini sandiri. Lang ipingkirhon atap wajar do atap lang ia manaron sitaronon ai. Tapi boritni ai do hansa iparuhurhon mambahen golap pangidah ampa pangahapanni. Sonai ma pangahap ni parjahat na tarsilang isambilou ni Tuhan Jesus ijia, halani boritni pangahapni na gantung bani silang ai gabe lang sompat ia mamingkirhon ai uhum na patut do na mangonai hubani, halani hajahatonni. Milas ibagas uhurni, gok rimas ampa domdom, tapi lang ibotoh atap huja papuasonni. Dobni gabe dihut ma ia manrehei Tuhan Jesus na tarsilang i lambungni, laho papuashon rimas, domdom ibagas uhurni ai.

Tapi anggo na tarsilang isiamun ni Tuhan Jesus ai, age pe sanggah ibagas sitaronon na borat ai, ipardiatei janah iparimbagashon do homa aha na masa i lambungni, na masa dampak Tuhan Jesus. Ibandingkan hubani dirini, ai uhum na patut do na mangonai bani, tapi anggo hubani Jesus lang patut namin, ai seng adong ihorjahon na jahat. Tapi lobihan do borat ni sitaronon ni Jesus, ai seng ampa irehei jolma simbuei homa. Age pe sonai ididah do bohi ni Jesus, damei do, lang songon na manrimas atap mardomdom dampak halak na mamakuhonsi ai. Sabalikni itangar do Hata ni Tuhan Jesus na mangkatahon: Ham Bapa sasap Ham ma dousa ni sidea, ai seng ibotoh sidea na binahenni in. Mangidah ampa manangar haganup na masa ai, patubuh sada keyakinan atap haporsayaon ibagas uhurni, sintong do in Jesus on do Mesias Anak ni Naibata, Sipaluah in. Halani ai mintor iondoshon ma dirini hu bani Jesus. Ham Jesus, ingat Ham ma ahu, anggo das ma Ham hubani Harajaon-Mu. Lang adong be pangarapan ni uhurni na legan sobali Tuhan Jesus.

Sonaha ia hita, anggo masa hubanta sitaronon ampa parlojuan na patut atap na lang patut nini uhurta domma nani haondosanta Tuhan Jesus? Ingat hita ma i lambungta do Jesus age sanggah ibagas sitaronon ampa parlojuan hita. Pardiatei janah parimbagashon hita ma sitaronon ni Jesus, ai bahen haluahonta do in, haluahon humbani uhuman sisadokah ni dokahni halani dousanta. Halani ai hu Bani ma tongtong hita marondos bani haganup panorang ampa situasi ni goluhta.

Tonggo: *Ham Tuhan Jesus, maidop ma uhur-Mu bannami pardousa on. Anggo masa sitaronon ampa paruntolon bananami, pargogohi Ham ma hanami laho mardingat sitaronon-Mu mangahapkon hanami, ase ulang mandolei hanami, tapi ase marondos hanami tontong hu Bamu. Amen.*

HALELUYA NO. 151:3+5

3. Ai daroh ni Tuhanta in,
in do bah tubuh in,
durus i Golgata do in,
manghopkop hita on.
5. Parjahat i siamun-Mu,
i Dolog Golgata,
mintor igolom hata-Mu,
ibaen porsaya da.

SADARI ON

“Jadi nini Jesus ma hu bani, “Sintong do hatang-Kon bam: Sadari on rap pakon Ahu ma ho i Paradeiso!”

Lukas 23:43

Balos ni Jesus dampak pangindoan ni parjahat na tarsilang i siamun-Ni, na dob mangondoshon pangarapanni hu bani Jesus, pataridahkon hu banta piga-piga hal:

Parlobei: Jesus do tongon Mesias, Kristus, Anak ni Naibata na roh hu dunia on. Ia do na boi mambagahkon ianan i Paradeiso ni Naibata hu bani sagala na porsaya janah marondos hu-Bani.

Paduahon: Lang adong panorang na lang igunahon Jesus laho paluahkon jolma in, ronsi das hu bani panorang parmatei-Ni pe, panghopkopon-Ni do in. Haganupan ihorjahon baen hasangapan ni Naibata.

Patuluhon: Marhitei na marondos hu bani Jesus, lang be habiaran ni jolma in sitaronon ronsi hamateion pe. Ai domma ibotoh hadobanni haganupan in, ai ma masuk hu Paradeiso i lambungni Naibata, ianan hagoluhan ampa hasonangan sisadokahni dokahni.

Paompatkon: Malas tumang do uhur ni Jesus, manjalo halak parjahat na ra mananda diri-Ni, na ra patoruh anjaha paubah uurni. Kesempatan pajumpah ampa manangar hata ni Tuhan Jesus sadarion, kesempatan do on homa on laho paubah uhur, anjaha marondos hu bani Jesus. Kesempatan na mungkin patar lang be jumpah hita.

Palimahon: Partolongan ampa pangurupionni Jesus lang onga terlambat, janah sempurna do ganupan pambahenan-Ni. Sadari on, anjaha rap pakon-Si do tongtong sagala na martengger ni uhur hu Bani.

Sintong, lang adong be na boi manasap dousanta sobali Tuhan Jesus, janah lang adong parhiteanni masuk hu Paradeiso anggo lang rap hita pakon Tuhan Jesus sonari.

Halani ai, ulang pala paima hita tongkin nari atap patar laho paubahkon uhurta janah manolsoli dousanta. Sonari ma tene! Janah sonari ma homa tangaronta balos ni Tuhan Jesus: Sadari on ma ho rap pakon Ahu i Paradeiso.

Tonggo: *Tarima kasih ma Bamu Tuhan, halani sirsir do Ham manjalo hanami pardousa on, janah ibagas Ham do Paradeiso hu bani sagala na roh marondos hu Bamu ibagas haporsayaon. Amen.*

HALELUYA NO. 130:4-5

- | | |
|---|---|
| <p>4. Domma mogap ganup dousanta bai daroh ni Tuhanta in.
Ai anggo porsaya do hita seng bulih hona uhum in.
Ibaen hata ni daroh in na mangkahui jolma in.</p> | <p>5. Halani ai unobkonon do au bai paridian in.
Hupasasapkon ma dousangku bai Jesus Sipagoluh in.
Anggo manolsol diri au bai Jesuskin tongtong au lao.</p> |
|---|---|

PARDEARAN IBAGAS KRISTUS

“anjaha padear haganup marhiteihon-Si bani diri-Ni, na i tanoh on age na i nagori atas, dob ipajongjong damei marhitei daroh-Ni na mandurus in bani hayu pinarsilang.”

Kolosse 1:20

Sagala usaha nuan itempuh bangsa-bangsa na i dunia on sonaha ase tarpajongjong damei barang pardameian i dunia on. Pala do ibentuk PBB, ai ma badan na mangusahahon pardearan bani bangsa-bangsa i dunia on, tapi kenyataan torus do adong porang, na mangkorhon buei korban jiwa ampa na marsitaronon. Porang lang be pitah marhitei sinjata, tapi porang politik, ekonomi, na lambin kejam akibatni bani hajolmaon on. Mambangun do jolma ibagas modernisasi on, tapi hotopan do mambangun “na pasedahon jolma in sandiri.” Haganup do mangkatahon laho padearhon tapi hadearon bani ai hotop gabe hasedaon do bani bangsa atap halak na legan. Na mardear bani sada halak, aima na sesuai bani keinginan ampa harusuh ni halak ai, age pe manrugihon bani halak na legan. Tar sonai do hotop pangarusionta pasal na madear ai. Anggo sonai do, keadaan sonari on ma hataridahanni, lang roh jabut ni ma lalab. Mase sonai?

Tapi anggo Jesus na mandalankon misi-Ni i dunia on laho padear haganup, seng harusuh-Ni idalankon tapi harusuhni Naibata Bapa-Ni in, na marsuruh la roh hu dunia on. Haganup goluh ampa pambahenan-Ni marunjolan bani “Holongni atei-Ni” bani hajolmaon on. Pala do madorus daroh-Ni i Golgata bahen padearan ni jolma in hu bani Naibata mula ni sagala hadearon in. Gabe korban la bahen pardameianta hu bani Naibata, janah na gabe onjolan ni pardearan ampa pardameian banta. Pardameian i tanoh on, bani goluhta si ganup ari, dampak hasomanta jolma, ampa pardameian i nagori atas i lambung ni Naibata, marhitei hasasapan ni dousanta, pitah ibagas dirini Jesus do jumpah hita ai. Panghopkopon na maronjolan bani holong na humbani Naibata, janah na itujuhon bani hasangapon ni Naibata do na boi padearhon, padameihon hita sama hita. Lang tarhorjahon hita ai anggo lang marhitei pangurupian ni Tuhan Jesus. Halani ai, maronjolan hubani holong ni atei na humbani Jesus, boi mardamei hita pakon hasomanta jolma, janah marupehi hita bani panghopkopon ni Jesus in.

Tonggo: *Tarima kasih ma Bamu Tuhan Jesus na dob mambahen dear haganup pardomuannami hu bani Naibata. Marhitei panghopkopon-Mu in, pargogohi Ham ma hanami marhitei Tonduy-Mu na pansing in, ase maruhur hanami janah maruhur padearhon ampa hadameion songon Ham. Amen.*

HALELUYA NO. 211:2+4

2. Haganup horjangkin,
seng boi sonang au ijin;
'Ge porlu pe uhurhin,
pala roh do iluhkin;
Pitah holong-Mu tumang
pangurupi, Ham Tuhan.

4. Dousa patundukkon au,
Ham ma paluahkon au;
Na butak tumang do au;
daroh-Mu manguras au.
Na sombuh, doyuk au on,
Ham ma artangkin tongtong.

PARMAHAN NA MADEAR 31 MARET

RONSI MATEI

“Ipatoruh do diri-Ni, na gabe pambalosi do la ronsi matei, pala matei tarsilang.”

Pilippi 2:8

Ipatoruh do diri-Ni, itadingkon do hasangapon-Ni, ha-Naibataon-Ni, gabe jolma Ia, anjaha marianan i tongah-tongah ni hajolmaon na mardousa on. Adong do halak na patoruh dirini i lobei ni halak halani na tarpaksa, atap na mambuat-buat uhur. Tapi anggo Jesus holong ni atei-Ni do na mangojur-Si patoruh diri-Ni, ase Ia gabe haluahon bani hajolmaon on. Ipatoruh do diri-Ni, ase marsangap Naibata Bapa-Ni in. Gabe pambalosi do la ronsi matei, pala matei tarsilang. In ma hataridahan ni toruh ni uhur-Ni ampa kesetiaan-Ni dompak Naibata. Seng tanggung-tanggung Jesus bani pambalosi-Ni, tapi sempurna, gok idalankon tugas ampa tanggung jawab-Ni, age pe marhiteihon ai maningon mamolus ragam ni sitaronon, hamarsikon risa-risa, ronsi das bani na matei tarsilang songon halak parjahat. Setia do Ia bani holong-Ni dompak Naibata ampa dompak jolma pardousa na hinopkop-Ni in.

Sonai ma ibahen Jesus, setia sampai mati Ia bani holong ni atei-Ni hubanta, setia Ia mangkasomani, parorotkon, ronsi mangurupi hita bai ganup panorang janah ibagahkon hubanta haluahon humbani uhuman ni Naibata. Patut pareksa hita homa sonaha ma nuan kadarni kesetiaan ampa pambalosi hu Bani? Gok do idalankon hita tugas ampa pambalosi hu Bani? Gok do idalankon hita tugas ampa tanggung jawab na iondoshon Tuhanta banta i tongah ni keluarga, i tongah-tongah ni kuria-Ni ampa i tongah ni masyarakat? Jaga hita, ai boi do tarjadi songon hatani peribahasa Indonesia na mangkatahon: Panas setahun dihapus hujan sehari. Ai tongkin do ibahen sibolis mandabuhkan hita, menghapus kesetiaanta, ampa pambalosi hu Bani Tuhanta ase ulang saud hita maluah. Soya do haganup halojaonta, pengorbananta na mar Tuhan Jesus on, anggo bani ujungni surut do hita manadingkon Tuhanta. Halani ai, sapala maridi bonsot ma, sapala na dob iirikkon hita Tuhanta torus ma, age pe marhitei in maningon manaron sitaronon ronsi das hu hamateian pe. Ulang sangsi uhurta, ai domma ipagijang Naibata Tuhanta Jesus i atas ni haganup janah domma ondos Bani sagala kuasa i tanoh on ampa i Nagori Atas pe. Halani ai do ase ibagahkon hubanta: Sai bujur ma ho ronsi matei, dob ai berehonon-Ku hu bamu sortali hagoluhan in.

Patut biaran janah holong ma uhurta dompak Naibata, ase dompak sagala na adong i dunia on.

Tonggo: *Urupi au Tuhan Jesus, laho patoruhkon uhur, ase gabe pambalosi au Bamu ronsi matei pe, ase marulih ahu bani rudang hamonangan ampa hagoluhan panasirsir-Mu in. Amen.*

HALELUYA NO. 116:8

8. Urupi Ham au, Jesus ase monang,
bai na mangimbang ganup munsuhkin.
Dunia on, sibolis pakon daging,
sai tong manarik au bai dousa in.
Pasangaponku tongtong goran-Mu,
bai iananku i surga in, bai iananku i surga in.